

Jaorverslag VVDS 2018-2019

Ut jaor van:

- Prins John d'n Urste en zien Prinses Marion
 - Ut jaor van Jeugdprins Thimo d'n Urste en Jeugdprinses Beau de Urste
 - Ut jaor van ut 8x11 jubileum van de Spurriemök
 - Ut jaor van de "hartstikke" korte en bondige speeches
 - Ut jaor van de 7 boterhamme
 - Ut jaor van de Rob Kunkeler stand-in
 - Ut jaor van ut Johnny Pony Bal
 - Ut jaor van de Bavariawage
 - Ut jaor van Daon
 - Ut jaor van de neje mutse, of toch nie
- En natuurluk ut jaor van wer un geslaagd vastelaovesseizoen

Ut bestuur bestoond uut:

- Vurzitter Robert Steeghs
- Vorst Jop Loonen
- Penningmèster Stijn Nelissen
- Sik Petra Raijmakers

En de bestuursleje . . . Han van de Sande, Rob Kunkeler, Loek Arts en Marc van de Ven

De Raod van Elluf bestoond dit jaor uut:

Pascal Classens - Fred Peeters - Roel Steeghs, Mark Steeghs, Paul Geurts, Sander Peeters, Daan Willems, Frank Steeghs, Wilbert Steeghs, William Steeghs, Bram Geerets, Toffel Gommans en Willem Lemmen

En ut dansmarieke was:

Steffie Steeghs

11-11

Ut seizoen begos ok dit jaor wer op d'n 11^e van d'n 11^e, en umdat ut zondag was begosse we ietskes vroeger. Vrej snel nao anvang was ut openingswoordje van de vorst, en daornao waon we gauw genoeg naor buute vur ut ienzègene van de mök. Alliën was dat ding d'r wer nie. Hej stound ien ut roëkhok, mar daar haaj iemes um wer weggehald. Uuteindeluk was hej hiël snel wer terug. Dat ging ienèns wel toen ozze vorst an prins Toffel mededèlde dat as d'r genne mök was dat dan de prins op de kneje mos gaon zitte en wier iengezègend. Nao ut ienzègene en naodat Prins Toffel ein-de-luk klaor was mit ziene speech, ginge we naor binne en wiere de neje leje vurgesteld, Bram Geerets as nej raadslid en Stijn Nelissen as neje penningmèster. Daornao was ut tied vur formule 1. Anderhallef uur latter, toen we Max zien twedde plats zage hale, en we allemaol unne nóg gröttere hekel hán an Fransoze, was ut tied vur un spelleke. Dit jaor wiere koste noch moeite gespaard, en was d'r unne heuse online quiz, den iederiën op de tillefoon mit kos doen. Tradisiegetrouw ging d'r nog urst iets mis mit unne laptop den un beeld naor un scherm mos sture. Gelukkig wiëte wej as ervare calamiteitechefs hier vort hiël rustig mit um te gaon. Nie dat we keus hebbe, ut is ok altied wat mit die dinger. Ut spelleke wier uuteindeluk gewonne dur ozze neje penningmèster. Dat was echt hoe dan ok fantasties, want óf hej is echt zo slim, óf hej wet de boel zoë te bezeike dat hej d'r ok nog winnend uitkomt. En as penningmèster ziende

zien dat beide gen slèchte eigenschappe. Uuteindeluk wier ut vur de mèste toch nog ietskes latter as gepland, mar ut was toch unne mojje opening van ut seizoen.

17-11 Vorsteraodsbal

Dit jaor moge wej mit z'n alle naor Venroj, die un groëte tent han nergezet vur un fiëstweekend. Anders dan anders kwame de vorste nao de opening nie terug de zaal ien, nieje, ze moge allemaal op koste van de Piëlhaas op de Bühne un pilske blieve drinke. Achter de geïmproviseerde tap stoond Rien Min van ut vroegere Upke, dus wat dat betreft hadde gen geluk as ge latter op d'n aovend pas mogt praote, wat enigszins bej bepaalde vorste wel an de dubbele tongval te huure was. Ma goed, uumlache is ok lache. Verder was biezonder dat d'r live geloot wier, dus ge wist ok nie wannier wie kwaam. Ut was wat rumoerig, de vorste kregen nie zoveul aandacht bej ut opkomme en afgaon, ut ging wel èrg snel aangezien per vorst mar vief minute zien gegève, mar uuteindeluk was ut wel unne geslaagde aovend, al haaj onder andere ondergetèkende mier ut gevuul dat d'r geslage was den aovend, an de ribbe te vuule. Misschien dat ut af en toe wel ietskes te lomp ging, mer dè heurt d'r baaj, aldus een van de mèst fanatieke van ut stel, den gèr anoniem woj blieve. Naoderhand ien d'n Terp was ut ok wer gezellig, en het ozze kersverse penningmèster zien toekomstplanne an os kenbaar gemakt.

01-12 Câtele

Op 1 december zien we naor Câtele gewist. Vorst Dirk ging dermit stoppe en d'r kwaam unne neje vorst uut. Ien urste instantie han we allemaal un hiële goeie reje gevonde um d'r nie hin te hoeve, mar toen ozze vorst es goed ien ziene spamfolder van de mailbox haaj gekeke, bleek dat alle vorste uitgenuëdigd ware vur "The Roast of Dirk". Ieder moog 1 minuut Dirk "roaste" zoëas ien ut welbekende tillevisieprogramma. Uiteraard mos vorst Jop daar toch mar gebruik van make, en nou begreep hej ok waarom andere vorste al unne tied lang "hun minuut cadeau waon doen".

Umdat hej d'r vanuut ging dat ze ien Câtele toch nie kosse telle het hej keurig binne de tied, van 7 vorste, Dirk geroast, en ut wier dur zowel Dirk as ut publiek gewardierd.

Toen hej was afgetreje kwaam nao unne hiële hoëp zinloos waachte, unne sort online quiz (jaowel, beter goed gejat as slècht verzonnen) en nog wat zinloze poespas de neje vorst Roel uut. Uuteindeluk hebbe we os wel wer vermakt, en ok dervur gezurregd dat os trio genne twedde kier naor huus het hoeve loëpe.

8 December zien we naor de Sterreparade ien Berge gewist, umdat daar dit jaor de Snollebollekes kwaame. Kort samegevat: Bus hin, verekkes druk, Bjorn en Mieke, Dries Roelvink, unne haffel andere artieste, un paar kandidate hebbe alvast ut prinsepak angeproberd, en muuj mar voldaan wer roond un uur of 1 mit de bus terug. Klein detail, de Snollebollekes begosse pas um hallef 2.

30 december zien we wer roond gewist vur ut prins raoje, dit jaor wer mit posteractie. Op ut dörpsplein en links en rechts ien de tuin bej meense begosse allemaal kluuze te verschiene. Bej den op ut dörpsplein koste 24 uur per dag de liedjes van os vurrige jubileum-cd oefene.

6 Jannewarie, un wèk latter, toen we allemaal wer fris en fruitig an ut neje jaor ware begonne, was ut tied vur de prinseproclamasie, waar we wer urst ien d'n Terp bejèn kwame um Prins Toffel en zien adjes Willem en Mikey af te laote treje. Ok vur um was d'r un moje proclamasie, hej moog nog ziene lèste speech doen, dizze kier zonder iederiën af te zanike, en uuteindeluk wier hun grei afgenome en stonde ze wer as gewoëne meense ien ut lève. De APK woj Toffel opneme bej hun club, en ze han carnavalsdinsdag es goed afgekeke hoe ge meense ien de zeik mot zette. Terwiel ex-prins Daan probierde um zien tekst af te lèze op zien trilpapier, ginge Han en Gerrit same mit

Toffel un paar vraoge beantwoorde waar den lèste eigeluk liever gen antwoord op woj gève. Ok de adudante kreges ut flink te verdure. Uuteindeluk wier hej toch opgenome bej de APK, en Willem ging verder as raodslid.

Efkes latter ien de Liende ging nie metiën de Bühne ope, mar nao unne korte voice-over wier d'r op un groët scherm unne fillem getoond. Noemeswaardig is ut feit dat ut dizze kier eigeluk vrejwel hiëlemol goed ging mit unne laptop en unne beamer. Naodat op de fillem was uitgeleet waar de kluuze vur diende, kwame van achter uut de zaal Vorst Jop en twië teamleje van de AIVVDS, Robert en Frank, de zaal ien. Naodat de kluus was gekraakt ware daar de 11 regels, en regel 10 was ongeloge: Nog noëit kwaam unne prins zo spectaculair uut: Vanuut ut dak kwame Prins John en Prinses Marion uut, en dat vonde ze un geweldige ervaring en vurral Marion woj dat gèr nog unne kier doen zei ze. Toen ze veilig onder stoonde deuj ozze Prins ziene urste korte en bondige speech, en daornao ginge ze ien unne groëte polonaise op de nek.

Daornao was ok bej de jeugd un code van de klène kluus nuëdig en toen die gevonde was mit behullep van de prins en Kluuzespecialist Frank kwame uut de groëte kluus Jeugdprins Thimo en Jeugdprinses Beau. Ok zej moge speeche, en ok ien unne groëte polonaise dur de zaal. De middag was nog gezellig, ondanks dat Prins John zien favoriete nummer "1000 sterre anvroeg", mar dat "as de sterre daarbaove straole" begrepe wier. Ut gebakke eier ète was ok èrg lekker, mar helaas mosse wej via de "Hallo Venray" verneme dat ozze prins bliekbaar ok spek haaj, alliën hebbe wej den nie gekrege.

Nao dizze ursten dag haaj Prins John ok al metiën un gat ien zien boks, mar das nog altied bèter as andersum.

19 jannewarie was ut fiëst der fiëste, ut Ald wieverbal. Tja, wat kunne we daar van zegge. Ut was un bietje druk. Zo druk dat d'r 4 raodsleje achter de bar hebbe gehollepe, de helleft van de raod mit glaas het gehald en d'r zellefs onder ien de soos glaas gespuuld zien umdat ut baove nie bej te halde was. En uuteindeluk han we Math en Wilma hóst angezope. De Rosentaler dun ut zoëas gewoënluk wer goed, en de kaoje smieke nog steeds naor unne rochel vet mit tarrels. Uiteraard wiere d'r ok wer prieze uutgedèld, en ozze prins John haaj nog unne Oeuvrepries vur de Hoëgewèg. Ut was un geweldig fiëst, mit as afsluuter den aovend eier ète bej Fred en Sanne, die wel gewoën vur spek han gezurregd. En uuteindeluk het ozze vurzitter Robert, umdat ge d'r anders toch praot van kriegt, mar gewoën Vera mit naor huus genome ien plats van Melanie.

26 jannewarie ware we naor ut jubileumfiëst ien Ysselsteyn gewist. Dat was unne aovend van neje ontdekkinge. Prins John en un aantal raodsleje ontdekte dat ge ondanks de hekke toch hiël hendig op de carnavalswage van de Piëlreuze kunt klimme. Vorst Jop het ontdekt dat as ge mit vère ien un gaskap blijft hange dat ut dan d'n hiële aovend meurt asof ge un kat ien de kachel het geflikkerd. En ok zien we d'r achter gekomme dat as ge ma lang zat waacht ge gratis frikandelle kriegt bej de vrèttent. En Willem is d'r achter gekomme dat ge nie perse naor huus hoeft te loëpe, ge ok gewoën ien Ysselsteyn urges kunt gaon slaope. Al mit al was ut wer gezellig.

1 en 2 fibrewarie ware de Bonte Aovende. Ut was wer un moj programma mit veul Oelderse artieste. As urste liet de ald-jeugd-raod zien hoe goed ze kosse zwemme. Daornao was ut tied vur Spotlight, de dansact die we al duk hebbe meuge bewondere op ozze Bonte Aovend. Daornao kwaam Ingrid Jansse as Luuzemoeder op de Bühne, en os allemaol de kriebels gève mit ur verhaal over Luus. Ok de APK was wer van de partij, en de schèrpe fotograaf mit zien hullep liete veul meense de Bühne op en af gaon um ze moj mit de prins en prinses op de foto te zette. **{KLIK}** De slagwerkgroep kwaam daornao, en dizze kier ware ze mit bessems en stök ien de weer um os te vurzien van un moj stukske slagwerk. Toen kwaam de urste Buut van de aovend: Barry Badjas, oftewel Koen van Soest, haaj wat rake klappe en grappe as bokser. As lèste vur de pauze kwame

de geknipte pony's, die buute unne cowboy, of unne pony han gezien, ik wiët ut nie mer, ut was ien ieder geval lache. Hier wier ok Rob Kunkeler ziene dubbelganger geprizzentierd, en den kos net zoëas de mèste kels 7 boterhamme op.

Nao de pauze kwaam ozze eige prins John same mit Emiel op as K3, oftewel Sanit-air. Same mit stewardess Marjolein brochte zej os naor höggere sfere mit hunne schèrpe en af en toe heerlijk flauwe grappe. Hiernaos was ut tied vur un stukske muziek van Gèn 4. Ik viend ut wel flauw dat ze dat d'r vur de zekerheid mar bej zette, dat 't d'r echt gèn 4 zien, hoewel qua volume ut misschien vur verwarring kos zurrege. Nao dees zangers kwame de vrollie van de raad op de buhne, hiëlemol ien ut duuster, mit lichtsnoere opgeplekt. Dit zaag d'r èrg leuk en origineel uut, en hoewel ze ut zellef nie woje, ware de meense toch blie dat ut licht ff an ging um te kieke wie d'r nou an ut danse ware gewist. Toen kwaam d'n twedde buutreedner van de aovend, en dat was niemes minder dan ozze eige Frank as Ger de gemèntewerker. Hej haaj hiële goeie grappe, en hej vertelde prachtig over al ut schoeffele bej de voetbalwedstrijde tigde Câtele. Hiël moj gedaon. As afsluuter ware dit jaor de Penthouseboys, die os allemaol mar hard liete werke. Vrejdags mos ozze Vorst den prins naor baove huffe, en Prinses Marion haaj pien ien de knaök van ut ligge waachte op ut podium. Vur de zaoterdag haaj ze unne stretcher geregeld, mar toen ware andere meense de pineut. Ut was mar goed dat de maon volop scheen.

Naodat alle artieste nog iëne kier op ut podium ware gewist ginge we d'r nog iëne drinke ien d'n Terp. Nao de zoveulste iëne het ozze prins ok alvast unne traay-out gedaon mit zien neje liedje.

9 fibbrewarie was de Senioremiddag. Omdat ut bezuukersantal toch wer terug was geloëpe han we teneinde raad iemes gevraagd um unne opbeurende speech te gève. Wellicht dat de keus vur Hay Achten misschien nie hiël verstandig was. Mar goed, den middag was zowieso geslaagd, de aldere han lol, de elders van John ware koning en koningin gekroond en de quiz mit "Petje op Petje af" was èrg leuk onder leiding van Commando Hay. Ondanks dat de organisatie zellef ok het gewonne, het WikiToffel os ok goed op weg gehollepe. As dank daorvur kreeg hej un prachtig roze hoedje waar Ger Jansse zellefs op afstand ien Venroj opgewonde van wier. De muziek was wel van Wil Peters, en de zang wier verzurregd dur William Steeghs.

Dizze middag was ok de twedde edisie van Expeditie Jeugd Mök. Ien totaal 67 jongere ginge de straat op um binne ut dörp de mök te bemachtige. Dit verliep allemaol wer hiëlemol goed.

Woensdag 13 fibbrewarie zien we wer bej Circus Rök gewist. Net toen we vurrig jaor dochte dat ut enigszins de goeie kant op ging wiere we dit jaor wer vermakt mit allemaol die goeie artiest. Oftewel, iëne hiële goeie act, sommige waarbej we enigszins wakker kosse blieve en andere waarbej we rustig d'n tied han os vaardighede van boëte en vliegtuugjes vouwe efkes op te frisse. Ut fiëst daornao was eik gen fiëst, de kroket bej de vrèttent was net zo kald as de kalde kak ien de zaal, en ut roëkhok was te wiet weg, dus we zien nie gek lang gebleve.

Zaoterdag 16 fibbrewarie was de resepsie vur Prins John en Prinses Marion. De muziekveriëning begos mit de sirrenade, en anslutend kwame Jan en Anita van de dörpsraad mit hun stand-in Jan en Anita naor veur um ut prinsepaar toe te sprèke. Daornao was ut de beurt vur alle vriende, familie, collega's en kennisse um un hëndje te gève, en anslutend was d'r un hiël gezellig fiëst mit de bierenbeulen. We hebbe geroeid, we hebbe gezonge, en ozze prins het zien eige nummer: "Zo lang de Oelderse Mökke nog lève" ten gehuure gebrocht. Ut was unne mojje aovend, mar urges ien de zaal liep "De man mit de Hamer" roond, en den het iën vur iën meense slachtoffer gemaakt. Zoë ok os raadslid Mark, den daordur zoëmar achteraoover donderde mit un blad bier. Gelukkig het hej daornao nog wel os prinsepaar naor huus kunne brenge. En daornao ok nog Niek Rejboks kunne ondersteune mit naor huus loëpe. Of was ut toch bej allebei andersum?

Zondag 17 fibbrevarie was de Jeugdceptie. Jeugdprins Thimo en Jeugdprinses Beau stonde op ut klène podium um alle cadeaus en felicitaties ien ontvangst te neme. D'r ware ok 5 andere jeugdverieniginge en mit z'n alle mieke ze d'r un groët fiëst van. Dizze middag het ut jeugdprinsepaar mit de jeugdraod ok hun eige nummer: Stamp! Ten gehuure gebrocht, en dat viel ok goed ien de smaak. De middag wier muzikaal opgeluusterd dur DJ Flapoer, oftewel ozze eige Willem Lemmen. Den vertelde bej ut tietenlied iën of ander verhaal ovver un bepaald familielid en zien achternaam mit un M. Waor Eric F. zich dit jaor bej de urste receptie keurig netjes gedrage haaj, lukte dat onder leiding van Mies W. en de obers Stoine en Toffel bej de jeugdceptie ietskes minder. Ik wiët nie of hej d'r wel vanaf het gewiëte, mar un ad-wedstrijd waarbej owwe tegestander Malt te drinke kriegt kunde simpelweg ok nie winne.

Vrejdag 22 fibbrevarie zien we ien Câtele gewist. We zun um 10 uur 's aoves verzamele, en Vorst Jop haaj d'r zoveul zin ien dat hej um 2 minute ovver 10 wakker wier op de baank. Uuteindeluk zien we toch nog ien Câtele beland, en daor stond Sjanté as band. Ut fiëst mos uiteraard wer dur de bezuukende verieniginge gemakt werre, en uuteindeluk hebbe we os wer vermakt. Helaas spulde vorst Jop zien Câtele-allergie wer op en haaj den daor 's nachts en 's merges behuurluk last van.

Zaoterdag 23 fibbrevarie was de krantverkoëp. De 55^e jubileumedisie van ozze krant was ok wer hiël moj geworre. Nao de uitreiking mos os Prinsepaar mit vorst Jop en vurzitter Robert snel naar Rooj, daor wiere de neje sprèkkamers van de Rabobank geprizzentierd. Umdat ut mos hebbe we daor ok mar gebruik gemakt van ut uitgebreide buffet mit wèrm vleis en te veul um op te noeme. Ut is mèj afzien as Prins. Daornao was de prinsefoto vur de Limburger, en daornao snel naar Holtus um de aftrap te doen van de Veterane. Un paar uur nao de krantverkoëp en un halleve tank diesel latter wer gauw naar huus um nog efkes uut te ruste.

'S Aoves was d'r un nej fiëst. Aangezien ozze prins nog gèr wat woj doen hebbe un paar raodsleje en un vrouw van de raod un fiëst op touw gezet: Ut Johnny-Pony Bal. Prins John wier prins Pony, prinses Marion wier Prinses Merrie mit zweep, de prinsensteek wier un Cap mit vère, en ziene scepter wier unne wortel. Zoëas mit de mèste halsoverkop verzonne fiëstjes wier ut behuurluk druk en gezellig. D'r was unne mysteriepony, Ingrid Willemsen, d'r was un optreje van Waldina, d'r wiere koprolle en Robrolle gemakt, en as tegeprestatie vur ut tappe en obere kreeg Mies unne betonne medaille waar hej kei blie mit was. Ut was unne mojje aovend den nog tot ien de late uurkes hiël èrg gezellig was.

Toen brook de wèk an waorien de vastelaovend ging beginne. Mar urst kwaam d'r nog wat slècht nejs vur un antal jeugdige wagebouwers uut Oeldere. Hunne groëte wage waar ze de afgeloëpe wèke an han gebouwd moog nie mitdoen ien d'n optocht vanwege de reclame van Bavaria. 1Limburg kwaam un interview afneme, L1 het gefillemd, en de reacties stromde aoveral binne. Ze moge alliën mitdoen as ze alle logo's af zun plekke. As dat mar ging lukke.

Op donderdag was de SJMO-carnaval. De jeugd haaj de sfeer d'r goed ien zitte en d'r zien hiël wat polonaises geloëpe.

Vrejdag 1 mart was de schólcarnaval ien Oeldere. Ondanks dat wej vantevurre precies han angegove hoe laat wej daor zun zien en wej daor ok precies op tied ware, begosse ze vanuut Câtele kant asnog te naöle wurrum we d'r vúr de middag nie ware. Ondanks dat de persoon ien kwestie dur merg en biën hin kos kwèke, hebbe wej dat gezeik ien os iëne oer derien laote gaon en uut os andere ienmiddels bloeiende oër wer deruut. De middag begos mit de schóloptocht, en daornao was d'r ien de Liende wer unne mojje vurbereiding op de echte vastelaovend, mit joekskapel en al.

's Aoves was ut ziekebezuuk. Vorst Jop is toen mit Prins John en Prinses Marion "efkes" bej Emiel en Ankie op bezuuk gewist. Ankie kos nie zoveul carnaval viere en ze vonde ut èrg leuk dat we "efkes" nève kwame.

Zaoterdag 2 mart begos ut echte wèrk. Vur de liefhebber was d'r 's mèrges ut Groët Vastelaovesontbijt ien de soos, dit kier zonder zwarte eier, en hier is os prinsepaar en un antal raodsleje bej anwezig gewist. Daornao naor ut jongste mòkske, en dit jaor was ut Alexander de Jonge mit zien trotse papa Nicky en moeder Michaela. Hej kreeg unne mojje medaille en ut Klènste Mòkske ien d'n tuin. Daornao wer snel naor d'n Terp, waar we verzamelde um naor Rooj te gaon.

Toen naor de Prinseinstallatie ien Venroj. Ut programma was dit jaor èrg goed, en de prinse en vorste ware vurnameluk te sprèke ovver de openingsact daor. Un dansgroep het os begeleid en gedanst, en de klier die ze an han ware temier wer un reje um vastelaovend vort ien de zomer en ien Braziliaanse stijl te doen. Laote we zegge dat we nao den dans blie ware dat we efkes nie op hoefde te staon. De sprèkers ware verder ok goed, en d'r was ok nog un klèn rolletje weggeleet vur vorst Jop, want same mit Vorst Niels prizzentierde hej de prinse uut alle dörpe. As afsluuter was d'r nog Rob Scheepens den un leuk verhaal haaj names B&W. Daornao hebbe we d'r twië gedronke, en toen ginge we daornao ien plats van naor de roetsj terug naor Oeldere, stickers plekke op de Bavaria-wage. De jeugd haaj goed uitgepakt: D'r was un Bavaria-promotieteam, d'r ware 80 man um te plekke, en d'r was zoveul ète dat zellefs Pascal ut nie allemaol op kreeg. Iederien haaj ut goed naor zien zin, en Tim Loone het nog efkes an de Bavaria-vrollie laote zien hoe ge ien d'n tractor an de pook mot zitte.

Bejna ansluutend was de mis. Dit jaor mit unne neje pastoer, den ut net iets anders deuj as anders. De prins begos mit unne speech, en de vorst sloot d'r zoëas gebrukeluk mit af. Ut was zellefs wer ietskes drukker as vurrig jaor. Tiejes de mis stoonde de mutse allemaol op ut trepke vur ut altaar en wiere ien de mis gezègend.

Daornao was de Jubileum Pre Party, mit muziek van Sjanté. Vanaf moment 1 zien d'r polonaises geloëpe, en dat is ongeveèr durgegaon tot richting ut end. Ut was moj druk, en èrg gezellig. Op un gegève moment kwame d'r un stel meense binne loëpe verkled as stukadoor en sperjesstèkers, mar latter bleek ut un stel Pole of Moldave ien hun eige klier. Zej snapte nie veul van carnaval, en dat is nie èrg, mar op un gegève moment wiere ze strontvervelend en halde ze os ut bloed onder de nègel uut. Gelukkig nao iën of twië kier vriendeluk verzuuke um op te tiefe ginge ze metiën weg.

Ut eier ète was natuurluk ok wer gewoën goed, en kosse we allemaol mit un volle maag naor bed.

Zondag 3 mart begosse we mit ut ophale van de hooghede en d'n optocht. De zaag-uul haaj zien wèrk wer gedaon en we kosse aoveral goed dur. Helaas ware sommige meense nie gediend van concurrentie wat zage betreft, en stuurde ze un kwoj bericht. D'n optocht was wer ietskes langer, en hoewel ut wèr nie gans mitzaat was ut toch wer moj. Daornao de priesuuttreiking waar uiteindeluk de Bavariawage as groëte winnaar uut de bus kwaam. Ut moje was dat de uitslag un kwartier vur de priesuuttreiking al op de website van de Peel en Maas te zien was.

Toen was de opening van de jeugdcarnaval mit de Speeches van jeugdprins Thimo en Jeugdprinses Beau, en ging ut fiëst gewoën lekker dur. Daornao efkes naor de soos, en verder naor d'n Terp, waar ut te zien was dat ut daags van tevurre laat was geworre, want ut was wel rustig. We kunne ut dan ok zeer wardiere dat ozze penningmèster wel gewoën anwezig was, en dan neme we vur lief dat hej 3 uur bej Paula en Gerrit op de baank het ligge slaope.

Mondag 4 mart begos ien de Liende mit ut snotneuzebal. De raad geniet altied volop van ut vrolijk rondhuppele van die jonge moederr... eeh kiender dur de zaal. Uiteraard ware de ballonne op ut einde wer èrg leuk vur de kiender.

Ansluutend was de groëte optocht ien Venroj, waar uiteindelik de Bavariawage mit 68% van de publieksstemme mit de publiekspries an de haal ging. Nao d'n optocht ekkes wat ète ien d'n Terp en snel dur naor de Liende, mit de uitreiking van de prieze van Jeugd Expeditie Mök. An ut end van de middag was d'r nog un spel waarbej de kiender ballonne an de vuut geknöpt kregen en die bej mekaar kapot mosse trappe. Uiteraard woj de raad dat ok probiere en wier ut lompste raadslid Roel de winnaar.

Daornao nog efkes naor de soos, en wer naor d'n Terp, waar ut un stuk drukker was dan den aovend dervur. Ut was èrg gezellig, en vur sommige meense misschien iets te gezellig, mar gelukkig kosse die efkes op de stoep bej Mies gaon zitte. Ok leek ut dat un bepaald raadslid zonne hekel haaj an naor huus gaon dat hej vur d'n derde aovend op rej zien bèst deuj um daor zo min meugeluk van mit te kriege.

Dinsdag 5 mart, alwer d'n lèste dag van de vastelaovend. Tradisiegetrouw begosse we mit d'n brunch ien d'n Terp, en uiteraard smiek dat ok wer allemaol goed. Ansluutend was de BBZ, den dit jaor vur de 11^e kier gehalde wier, en nao 11 jaor wet de commissie nog steeds verrassende acts op de bühne te kriege, van gewoëne Oelderse meense tot ald klasgenote of vriende van ut prinsepaar. Uiteraard ware de Venrodse CD-artieste d'r ok wer bej, en de hiële zaal deuj van ut begin tot ut end mit. Os alde en jonge hooghede hebbe dizze middag ok nog hun eige liedjes gezonge. Ok dit jaor was de BBZ wer gewoën goed. Daornao was ut kienderbal, mit an ut end van de middag de afsluuting vur de jeugd ien de zaal. Hoofd van de jeugdcommissie Pascal den haaj wer un proclamatie die Jeugdprins Thimo en Jeugdprinses Beau moge vurlèze. Daornao nog iëne kier allebei speeche en ien de nek vur unne groëte polonaise. Daornao was d'r nog ète, en koste kieze ut hamburgers of knak. Ut fijne van de knak was dat ge ien ieder geval nie mer hoefde te blaaze. Ansluutend ginge veul meense nog naor d'n Terp. Un delegatie ging rond un uur of 10 afsluute ien de soos, waar buute op ut plein de mök van de jeugd ien de fik ging. De vastelaovend van de jeugd was vurbej, al kriege zej, net as de groëte prins, ien november nog un paar bonusdaag.

Daornao ien d'n Terp was ut rond hallef 12 tied um af te gaon sluute. D'r wier afscheid genome van dansmarieke Steffi, en raodseje William mit Petra, en Frank. Ut leek alsof d'r iemes doëd was gegaon, althans zoë rook ut wel. Ut leek wel un wedstrijd meure vur gevorderde.

Gelukkig was d'r ok wer metiën vervanging vur ut dansmarietje. Vanaf volgend jaor gaon Renske, Judith en Amber ien ut dansmariekespekske.

Daornao moog prins John ziene lèste speech van dizze vastelaovend halde, hej hield ut uiteraard kort mar krachtig. Ansluutend ginge we naor buute en ging ok de groëte mök ien de hens. Vastelaovend 2019 was vurbej, en kunne we alwer uitkieke naor de jubileumfiëste.

Dit was ut jaorverslag 2018-2019.